

## SUNS 2012: UDIN CAPITÂL DE MUSICHE DI MINORANCE DE EUROPE

**Finalissime ai 2 di Novembar al Palamostre cun nûf concorints**


Udin, ai 30 di Otubar - A son nûf i concorints di SUNS 2012, il Festival european de cjançon in lenghe minoritarie, che si contindaran a Udin, vinars ai 2 di Novembar, aes 21 sul palc dal Palamostre, il biliet di lade pe finâl dal Liet International, il plui famôs festival dedicât ae cjançon in lenghis di minorance.

Progjet centrâl pe promovion de lenghe furlane - in gare chest an a partecipin doi grups dal Friûl Vignesie Julie - SUNS al è un event inmaneât de ARLeF, Agenzie regionâl pe lenghe furlane, dutun cun Onde Furlane e l'associazion "Il Campo" e al è stât presentât vuê a Udin, te sede de Regjon, di bande di William Cisilino (dretôr ARLeF), Leo Virgili (dretôr artistic) e di Valter Colle (progjet SUNS).

**MADE IN FRIÛL** - SUNS al è un format nassût in Friûl par promovi e meti a confront lis musicis di minorance de Europe, che tal zîr di un pâr di edizions al è cressût tes partecipazions, te cualitât fin a ricevi des propuestis di espuartâlu in altris bandis, esperience za fate l'an passât tai Grisons, intant che in Friûl si ospitave la finâl europeane dal Liet.

**ARLEF DUTUN CU LA MUSICHE E I ZOVINS** - Il president de ARLeF Lorenzo Zanon al à marcât il grant sfuarç organizatîf metût in vore in chescj agns par fâ diventâ Udin e il Friûl la capitâl de musiche in lenghe di minorance. "Un progjet che al è centrâl te promovion de lenghe e de culture furlane parcè che si insede intune vision di confront e vierzidure sedi aes culturis e aes lenghis europeanis, dispès ancje une vore lontanis, sedi aes formis artistichis e ai lengaçs musicâi che invezit a son plui dongje ai zovins. E par fâ cressi une lenghe - al sotlinie Zanon - non è nuie di plui impuartant di chescj doi aspiets".

**MUSICHE FURLANE PROTAGONISTE** - Si ricuardarà il protagonisim de musiche furlane al Liet indulà che Lino Straulino e Carnicats a son rivâts al tierç puest e i R.esistence in dub a àn vinçût. Chest an in gare a son i Mig 29 over Disneyland e i Jonokognos.



**ORKA OSPITS SPECIÂI** - Il straordinari grup che al rive des misteriosis isulis Fær Øer sul palc di Suns al sunarà cun musiciscj locâi (un coro sloven e un quartet di arcs furlan) metint in pratiche une colaborazion straordinarie fra minorancis. I Orka a sunaran la dì dopo di SUNS, sabide ai 3 di Novembar, aes 21, un concerti plui lunc a Cividât, al teatri Ristori, insiemit cuntune performance di poesie sonore di Antonella Bukovac. La performance DOM LJUBI DOM, event in colaborazion cul Istitût di Culture Slovene - ISK - e Postaja Topolove, e viodarà la partecipazion di Antonella Macchion (violoncel), Sandro Carta (trombe) e Massimo Croce (rumôrs).

**LA GARE** - Te serade, presentade di Mojra Bearzot e Gianluigi Patruno, ducj i grups e i soliscj selezionâts di une zurie europeane jenfri une cuarentine di participants al bant, a sunaran un toc sôl e i ospits un set di 20 min. In gare Billy Fumey (franc provençâl); Casper Nicca (romanç dai Grisons); Claudia Crabuzza e Claudio Gabriel Sanna (Catalan di Alghero); Jean Ruaz (ladin); Jonokognos (furlan); Mig 29 over Disneyland (furlan); Randagiu Sardu & Quilo (sart); Ruben Dimitri (cravuat dal Burgenland); Somi de Granadas (ocitan).

**PREMI** - Doi premis, chel pe "miôr cjançon" (decidude de jurie internazionâl) e chel pe "miôr propueste artistiche" (decidude de jurie e dal public in sale). I vincidôrs a parteciparan ae fase finâl europeane dal Liet International che si davuelzarà a Gijon/Xixon tes Asturiis il prin di dicembar 2012.

## Region Autonome Friûl Vignesie Julie

Ufici Stampe

dot. Elisabetta Pozzetto

*ARLeF - Agenzie Regjonâl pe Lenghe Furlane*

0039 0432 555724 fax 0432 204158

mob 0039 335 8002058

